

COLUMNA

Chalandamarz cun bandieras a mesa asta

DAVID SPINLER

Tut capita sco mintgadi. Jau vom a lavurar. Jau hai mes temp liber. Jau hai mias incumbensas e mes quitads. E tuttina n'è nagut sco adina.

Puspè stuain nus guardar sin ina guerra terribla e nunchapibla sin quest mund. Ina persuna cumonda cun sia idea da grondaschia il destin da milliuns persunas che avevan avant paucs dis era anc in mintgadi dal tuttatfatg normal.

Jau hai empruvà da m'imaginar il mintgadi da signur Putin: Ha el in mintgadi per el dal tuttatfatg normal e dà tranteren ils cumonds per las attatgas sgar-schavilas? U è el l'entir di gnervus perquai ch'el sa ch'el gioga cun il fiu, ch'el è responsabel per ina gronda crisa mundiala? Ina crisa, da la quala naging na sa co che quai va a finir. Ha el ina conscienza – e sche gea, tge di quella ad el durant quests dis? Forsa ch'el è era ina da quellas persunas che n'han nagina conscienza e ch'ils psicologs numnan sociopat? In sociopat n'ha nagina compassiun cun auters umans, el persequitescha simplamain sias atgnas finamiras e manipulescha e cugliu-



na ses conumans senza ve-sair in problem en quel agir. Il carisma dad in sociopat zuppa ses agir senza scrupels envers ils conumans.

Oz è Chalandamarz. En sasez avessan nus damai da stgatschar l'enviern, cun stgellas e plumpas e cun ils schlops da las giaschlas. In di plain optimissem e speranza.

Mia proposta per il Chalandamarz è dentant da far quest onn ina excepziun: stgatschain las guerras! Quella en l'Ucraina e tut las autras sin quest mund! Tramettain quest signal simbolic ora en il mund. Jau sai ch'il president da la Russia na vegn betg a tadlar sin stgellas da l'Engiadina u da la Val Müstair. Ma jau

sun persuadì che la populaziun russa vesia ils protests sin tut il mund. Cun demonstraziuns enturn ed enturn il globus. Millis demonestreschan, envidan chandailas ed expriman be in giavisch: da finir las guerras sin quest mund. Uschia fiss era il Chalandamarz che vul stgatschar las guerras empè da l'enviern in signal impurtant tranter blers auters.

Ed era las propagandas e zensuras raffinadas na vegnan betg a pudair tegnair zuppà ils protests mundials per la populaziun russa.

Dal rest: a la Confederaziun fatsch jau la proposta da metter las bandieras en tut il pajais sin mesa asta enfin che la guerra encunter l'Ucraina è terminada. Era quai fiss in ferm signal. Natiralmain sper decretar tut las sancziuns pus-savilas encunter il stadi russ.

Forsa che nus pudain gidar a mover insatge – vers in svilup positiv e pli paschaivel sin quest mund, cun bandieras a mesa asta e cun plumpas e stgellas da Chalandamarz.

David Spinnler da Sta. Maria è mainagestiu dal Parc da natüra Biosfera Val Müstair.